

Inyarubha ya kabhiri ya Paauru kwa Timoseo Ubuhukangati

Inyarubha yinu yandikirwi na Paauru. Akamwandikira Timoseo, umusakirya waazi wa haguhi. Hanu Paauru aandikiri inyarubha yinu aari mokebhoho Ruumi na akamenya ariitwa ibhaga iguhi. Akeenda Timoseo aji iwaazi naatu komorora.

Kinu kigiriryi kwandika inyarubha yinu, ni-kanaja Timoseo, korereke abhi isiriiryi kuran'ya Ing'ana Inzamu iguru wa Yisu, akaji kwigumirirya amakung'u guusi. Kwiki, akabhuurira Timoseo aangi kwa amanaga guusi amijja gu ururimi, iiji ga amaheene. Itiniru, Paauru aari ariigomba bhukung'u korora Timoseo.

Amakeeren'ya

¹ Inyarubha yinu nandikiri inyi Paauru, umutumwa* wa Yisu Kiriisitu kabhusigi bhwa Mungu. Nirubhwirwi kuran'ya ubhuragi bhwa ubuhuru. Ubuhuru bhuyo bharabhoneka ku ukwisirirya Yisu Kiriisitu.

² Nirakwandikira mwana waani Timoseo umusiigwa.

* **1:1 Umutumwa.** Kumaragirira bhukung'u, rora ring'ana abhatumwa muKiniibhasa.

Ibhigangi no omorembe kurwa kwa Bhaabha Mungu, na kwa Yiesu Kiriisitu Umukuru wiitu, bhibhi na naawi.

Paauru arakumya Mungu na kunaja Timoseo

³ Nirakumya Mungu wunu nekohokerya kwa koro nziru, chimbu bhaakuriri bhasukuru bhaani. Ribhaga ryasi nirakuhiita mumasabhi gaani ubhutika nu umwise.

⁴ Nirahiita zingusuri zaazu hanu twaragiini. Niriigomba bhukung'u kuhunana na naawi naatu, korereke nibhi no obhozomerwa bhukuru.

⁵ Naatu nirahiita ubhwisirirya bhwazu bhwa amaheene. Ubhwisirirya bhuyo, aari nabhwi nyakukuru Ruisi na yiya waazu funiki. Nina amaheene kubha awusi unabhwi.

⁶ Necho nirakuhiita, okore umucha kokorera ubhunaja bhunu Mungu akuhiri hanu nakutiriri amabhoko.

⁷ Korabhu, ku kubha ekoro yinu Mungu aatuhiri itari yu ukututura tubhi bhubha, nawe yo okotoha amanaga, ubhusigi nu umwayu gwe ekerego.

⁸ Mmbe, utarora zisuni komenyeekererya amang'ana iguru wu Umukuru wiitu, hamwi korora zisuni ku kubha niri mokebhoho iguru waazi. Nawe wiigumiriryi munyaaku hamwimwi na niinyi, iguru wi Ing'ana Inzamu chimbu wahirwi amanaga na Mungu.

⁹ Ewe akatusabhura, akatorobhora tubhi abhaatu bhaazi. Atakuriribhu ku kubha ya amahocha giitu amazumu, nawe akakora ku kubha yu ubhusigi bhwazi ni ibhigangi bhyazi. Akatororera

ibhigangi bhiyo iguru wa Yisu Kiriisitu, kwima isi ikiri kubhumbwa.

¹⁰ Nawe nangu, Mungu irikiin'yi amazumu gaazi kwa niitwi, ku kuuza kwa Yisu Kiriisitu Umusabhuri wiitu. Ewe ahiziri amanaga gu uruku, irikiin'yi ubhuhuru bhwa kemerano kanzira yi Ing'ana Inzumu.

¹¹ Iguru wi Ing'ana Inzumu yiyo, nirubhwirwi kubha umurwazi, umutumwa, naatu umwija.

¹² Inyi niranyaaka iguru wa riyo. Nawe nitakorora suni, ku kubha nimwizi wanu niisiriiryi. Na nizi ing'ana ye eheene yinu ang'iri, arayangarira bhwaheene kuhika urusiku rwa ukugaruka kwawe.

¹³ Ugwati bhwaheene amijja ga amaheene ganu nakwijiryi. Wiji gayo na usaagi nu ubhwisirirya nu ubhusigi bhinu bhekobhoneka kwa Yisu Kiriisitu.

¹⁴ Ing'ana ye eheene yinu wahirwi, ugaangariri kwa amanaga ge Egoro Indindu yinu iri mumibhiri jitu.

¹⁵ Awi uminyiri abhaatu bhusi bhi icharu cha Asiya bhaantigiri. Gati waabha bharimu Figero na Hirimogene.

¹⁶ Nirasabha Umukuru abharorere ibhigangi abhaatu bha Unisifuru, ku kubha aari arasambarucha umwuyu gwani manga kaaru, na ataruzi suni kuuza kondora hanu naari mokebhoho.

¹⁷ Na hanu iiziri marubhiri rwa Ruumi ranu, akang'eha komohya kuhika akambona.

¹⁸ Na naawi uminyiri bhwaheene, amaru ganu ankuriiri marubhiri rwa Efeeso iyo. Umukuru Yisu amohe ibhigangi urusiku rwi itinira.

2

Kubha nu ubhwigumirirya momeremo ja Mungu

¹ Nangu mwana waani, ubhi na amanaga kunzira yi ibhigangi bhinu tubhwini ku kwisirirya Yisu Kiriisitu.

² Wiigwiri amiija ganu nakwijiryi mubhutangi bhwa abhaminyiikiriri bhaaru. Nangu ubhahi amiija gayo abhaatu abharonge, bhanu bhakutara kwija abhandi.

³ Wiigumiriryi manyaaku hamwimwi na niinyi, nchu umusirikari umuzamu wa Yisu Kiriisitu.

⁴ Atareeho musirikari wanu akutiga kokora emeremo ji ikisirikari, asikiri momeremo ginu gitari ji ikisirikari. Atakwisikirya mugiyu, ku kubha areenda komozomerya umukuru waazi.

⁵ Nuru wanu akuhiza mwibharaana, atakutara kuhaabhwa umubhanu ariitami kwangarira imigira ja ribharaana.

⁶ Umurimi wanu akohocha kumucha, wuyo areenderwa kubha we embere kobhona amagesa.

⁷ Timoseo, wiseege bhukung'u iguru wa amang'ana ganu nikukubhurira. Umukuru Mungu arakoha ubhanaja bhwu ukwobhoora guusi.

⁸ Uhiiti Yisu Kiriisitu wi ikishoko chu amatimi Daudi,* Mungu akamuryara kurwa mubhaku. Yiyo neyo ing'ana inzamu yinu nikurwaza.

⁹ Ku kubha yi ing'ana yiyo, inyi niranyaaka na kobhohwa ne emenyororo nchu umubhi. Nawe ing'ana ya Mungu itakutara kobhohwa.

* **2:8 Daudi.** Kumaragirira bhukung'u, rora Ikiniibhasa. Rora 2 Samwiri 7:12-13.

¹⁰ Iguru wa riyo, niriigumirirya guusi iguru wa abhaatu bhanu bharubhwirwi na Mungu kubha kwawe, korereke buusi bhasung'aani ubhutura kuhitira Yisu Kiriisitu, na kugwatana nu ubhugungu bhwa kemerano.

¹¹ Ring'ana rinu ni-rya amaheene:
“Arubhi tukuuri hamwimwi na Kiriisitu,
turiikara hamwimwi nawe.

¹² Arubhi turiigumirirya,
turakangata hamwimwi nawe.
Arubhi turamwanga ewe,
wusi aratwanga.

¹³ Arubhi itwi tutari bharonge kwewe,
ewe arasaaga moronge,
ku kubha ewe ni-wa amaheene.”

Amaswaja komohocha umuzimu wa Mungu

¹⁴ Ubhahiityi abhiisirirya amang'ana gayo, na kubharecha mubhutangi bhwa Mungu, bhatigi kuhakaana iguru wa amang'ana amasuuhusuuhu. Zihaka ziyo zitaana bhweru, na zirabhasarya bhanu bhakwigwa.

¹⁵ Ikong'eererya kwija ring'ana rya amaheene, chimbu ikwenderwa kwa Mungu. Hayo urabha omohocha wenu ataana suni iguru we emeremo jazi. Kokorabhu nekwe Mungu akwisirirya.

¹⁶ Utigi amang'ana ganu gataana bhweru bhwubhwusi, ku kubha gayo garatwara abhaatu kore bhukung'u na Mungu.

¹⁷ Amijja gaabhu gaangi rigaati rinu rikutamanyara umubhiri. Gati waabhu bharimu Himinayo na Fireto.

¹⁸ Bhayo bhabhuriri bhukung'u, bhatigiri amaheene ku ukugamba kubha, ubhuryuku

bhwa abhaku bhumariri kuhuruka. Ku kwijabhu, bhararimirya ubhwisirirya bhwa abhaatu abhandi.

¹⁹ Nawe abhaatu bhanu bhiimiiriiri bhwima, bhaangi ubhuruza ubhunagu bhunu bhutirwi na Mungu. Ni iguru wu ubhuruza bhuyo gaandikirwi amang'ana ganu, "Umukuru Mungu aminyiri abhaatu bhaazi,"† nu, "Umuntu wawusi wanu akwibhirikira ewe ni-wu Umukuru Mungu, atigi ubhubhi."

²⁰ Munyumba ikuru, bhirimu ebhegero bhyaru, bhirimu bhyi izahaabhu na zimpirya, bhyo obhototo na bhyi imiti. Ihindi bhyu ubhwera, ibhindi bhitari bhyu ubhwera.

²¹ Nangu, umuntu ariibhinkuki ku kutiga ubhubhi bhuyo bhwasi, arabha nche ekegero cha amahocha ga hagari kinu kirubhwirwi, arabha isiririibhwi kuMukuru waazi, arabha isiriiryi komeremo jusi imizamu.

²² Utigi umwuyu gu ubhumura, ubhi ne eheene, ubhwisirirya, ubhusigi no omorembe, hamwimwi na bhusi bhanu bhakusabha Umukuru kumwuyu umwira.

²³ Utigi kutuna zihaka ze ekegeege zinu zitaana bhwera, ku kubha uminyiri ziyo zirareeta iryuma.

²⁴ Naatu, itakwenderwa omohocha wu Umukuru kubha mwamani. Nawe abhi mwigumirirya, manyuhu kubhaatu bhusi, nu umuntu wanu akunaja kwija.

²⁵ Areenderwa abhi arabhahama kwa bhanyuhu abhaatu bhanu bhakuhakaana nawe,

† 2:19 Rora Ukubhara 16:5.

korereke hamwi Mungu abhahi kutiga ubhubhi na komenya amaheene.

²⁶ Neho, amang'ini gaabha gabhagarukiri, bhasabhuki kurwa mwiheto rya Shitaani. Ewe abhagwatiri, korereke bhabhi bharakora ubhwindi bhwazi.

3

Ubhubhi kuzisika zi itinira

¹ Nawe omenye, zisika zi itinira karabha na ribhaga ikung'u.

² Ribhaga riyo, abhaatu bharabha bhariisiga abheene, bharabha bhasigi bha mpirya, bharabha abhiirari, bharabha bhi ikitwi, bharabha bha amatuki, bhatakusuka abhiibhuri bhaabha, bhataana bhukumya, na bhatakosengera Mungu.

³ Naatu, bhataana bhasigi, bhatakwenda bhwigwani, abhagubhi bha abhaatu, bhatakwihama, bhahaari, bhatakusiga amazumu,

⁴ bharabha bhiichuri, bharabha bhakokora kibhikibi, na bharabha bhiiyungi. Bharabha bharasiga amang'ana gi isi kutiga gu ukusiga Mungu.

⁵ Abhaatu bhayo bhararorekana ni-bhaatu bhanu bhakwikara chimbu Mungu akwenda, nawe mozekoro zaabha bharaanga amanaga ga Mungu. Utaani na abhaatu bhe eteemwa yiyo.

⁶ Gati waabha bharimu bhanu bhakusikira ku ubhwindi ubhubhi muzimbiri za abhaatu, na kukangirirya abhakari abhageege. Abhakari bhayo bhazirwi nu ubhubhi, bhararutwa ni inamba yo okokora amabhi uyuyisi.

⁷ Abhakari bhayo bharūga siku zūusi, nawe bharatamwa komenya amaheene.

⁸ Abhaatu bharya, bharabhagira amaheene, chimbu Yaani na Yamburi,* ni-bhanu bhahakaaniri na Musa. Abhaatu bhayo bhasarikiri amang'ini, bhatigiri kwisirirya Mungu.

⁹ Nawe bhatakutara kuhika hūhūusi, ku kubha obhogege bhwabhu bharamenyekana kubhaatu bhūusi, chimbu yaari kwa Yaani na Yamburi.

Amaswaja ga Paauru kwa Timoseo

¹⁰ Nawe awi, utuniri amijja gaani, eteemwa yaani, ubhwindi bhwani, ubhwisirirya bhwani, ubhwigumirirya bhwani,

¹¹ ubhūsiigi bhwani nu ubhurindi bhwani. Uminyiri chimbu nabhwini inyaaku, hanu naari mazimbiri za Antiyukiya, Ikūniyu na Riisitira. Naatu, uminyiri kubha nikiigumirirya amakung'u guusi, nu Umukuru akansabhura mugayo guusi.

¹² Mmbe, bhūusi bhanu bhariisirirya Yisu Kiriisitu na bhareenda kwikara ubhwikari bhu ukukumya Mungu, bharabha bharanyaakibhwa.

¹³ Nawe abhakari bhu ubhūsarya na abhakangirirya bharang'eha kukiraho kubha bhasarya bhakung'u, bharabha bharakangirirya na kukangiribhwa.

¹⁴ Nawe awi, uminyiri amang'ana ganu wi-ijibhwi, ni-ga amaheene. Nangu wiikari mugayo, ku kubha uminyiri ukiga kurwa kwa bha wiwi.

* **3:8** Irarorekana kubha **Yaani** na **Yamburi** nebho bhanu bhaari abhagabhu bhu umatimi wi icharu cha Miisiri. Rora Kūhūruka 7:11-22.

15 Kurwa mubhwana, uminyiri Amaandiku Amarindu. Amaandiku gayo gakuhiri ubhwebhware, kuhika kusung'aana ubhutuurya kanzira yu ukwisirirya Yisu Kiriisitu.

16 Amaandiku Amarindu guusi gaandikirwi kubhakangati bhwa Mungu. Gayo gareenderwa kwija amaheene, kubharecha abhaatu, korereke bhatigi ubhubhi bhwabhu, kubhakangata hanu bhakubhurwa, na kobheerecha kinu chusi kikwenderwa mubhutangi bhwa Mungu.

17 Amaandiku gayo garakora umutu wa Mungu abhi isiriiryi na kubhanurwa kokora emeremo jusi imizamu.

4

1 Nirakutuma embere wa Mungu na mubhutangi bhwa Yisu Kiriisitu, wanu akutinira abhahuru na abhaku, na newe araazi kukangata nchu amatimi.

2 Nangu, rwaza ing'ana ya Mungu. Okorebhu ribhaga ryaryusi, rizumu hamwi riibhi. Recha na yangirija, ubhahi umwuyi na kubhijja kubhwigumirirya bhwusi.

3 Riraaza ribhaga rinu abhaatu bhakubha bhatakwitegeerera amijja ga amaheene. Bharabha bhareenda kwitegeerera ganu gakubhazomerabhu, na korobhora abhijja bhaaru bhu ukubhijja ganu bhakusiiga kwigwa.

4 Bharatiga kwitegeerera amaheene, na bharatuna amaganu gi ikari ganu gataana enzobhooro yuyusi.

5 Nawe awi, ubhi misu kwa guusi, wiigumiriryi inyaaku, okore emeremo ju ukurwaza ing'ana

Inzumu, okore bhwaheene mobhohocha bhwazu bhwusi.

⁶ Nirakubhaurira gayo, ku kubha amasaahi gaani gari haguhi kuhurukibhwa nchi ikimweso, ahagero hu ukuhurukirya ikimweso.* Ribhaga ryani ryu ukukwa rihikiri haguhi.

⁷ Nitiini rihi rizumu, nimariri orogendo, na nigwatiri ubhwisirirya.

⁸ Nangu isaagiri kuhaabhwa ikirungu che eheene. Umukuru Yisu, umutiniri we eheene, arang'a urusiku rwa ukugaruka kwazi. Itari inyi inyimwene, nawe na abhandi bhusi bhanu bhakwisega kugaruka kwawe.

Amasabhi ga Paauru kwa Timoseo

⁹ Timoseo, ikong'eererya kuuza bhwangu iwaani,

¹⁰ ku kubha Deema antigiri. Ewe akasiiga amang'ana ga kusi, akatinira kuja kurubhiri rwa Tisaruniki. Kirisiki agiri icharu cha Garaatiya, na Tiitu agiri icharu cha Darimatiya.

¹¹ Ruuka umwene newe asaagiri hamwimwi na niinyi hanu. Nangu, uriizi inu, uuzi na Maaroko, ku kubha aratura kansakirya emeremo ja Mungu.

¹² Nikatuma Tikiku urubhiri rwa Efeeso.

¹³ Hanu uraazi, uuzi ni ikabhuuti yaani yinu nati-giri kwa Karipu, urubhiri rwa Turowa, ni ibhitabhu bhirya, kindu bhya riseero.

¹⁴ Arikizanda umuturi wi ibhyuma, ankeriri ubhubhi bhukung'u. Umukuru aramutinira kuring'aana na amahocha gaazi.

* 4:6 Rora Kukuruka 29:38-41.

¹⁵ Na naawi wiyangariri nawe, ku kubha aari araanga bhukung'u amijja gita.

¹⁶ Hanu niibhagiiri mutinira korogendo rwe embere, ataari areho nura wamwi wanu imiiriiri urubhaara rwani, bhusi bhakantiga. Nirasabha Mungu atigi kubhabharira ubhasarya bhuyo.

¹⁷ Nawe Umukuru aari hamwimwi na niinyi, akang'a amanaga kwerekeererya Ing'ana Inzamu yusi, korereke abhaatu bhusi bhanu bhatar Abhayaahudi bhiigwi. Akansabhura muruku, ku kubha naari nkina mumunywa gwi iika.

¹⁸ Nizi arang'eha kunsabhura mumabhi gusi, na kundiibha kuhika mubhatimi bhwazi bhwa mwisaaru.

Umukuru agungibhwi kemerano! Garami.

Amang'ana gu ukwaga

¹⁹ Okeerye Akiira nu umukari waazi Pirisiira, na bhanu bhari munyumba ya Unisifuru.

²⁰ Iraasitu akasaaga murubhiri rwa Kurintu. Turufimu nikamutiga kurubhiri rwa Mireeto, aari murwiri.

²¹ Nangu, okore bhwangu kuuza ribhaga rye embeho rikiri kuhika. Ihuuru, Pudi, Riinu, na Kiraudiya, hamwimwi na abhiisirirya bhusi, bharakokeya.

²² Umukuru abhi hamwimwi na naawi. Ibhigangi bhyazi bhibhi hamwimwi na niimwi.

**Ubhuragi Ubhuhya Mukigambũ chi Ikikiizũ
Ikizu: Ubhuragi Ubhuhya Mukigambũ chi Ikikiizũ (New
Testament+) for Tanzania**

copyright © 2024 Wycliffe Bible Translators, Inc.

Language: (Ikizu)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 3 May 2025 from source files dated 3 May 2025

cfe4772f-9f09-59a0-b72b-3863d6657553